

四庫全書

史部

欽定四庫全書

史部

建炎以來繫年要錄卷一百二十四至  
六

詳校官侍讀學士臣陸伯焜

侍讀臣孫球覆勘

膳錄貢生臣黃琮

膳錄貢生臣黃道照

欽定四庫全書

建炎以來繫年要錄卷一百二十四

宋 李心傳 撰

紹興八年十月

按是月  
癸丑朔

甲寅檢校少傅奉國軍節

度使知紹興府趙鼎充醴泉觀使免奉朝請從所請也

中衛大夫貴州防禦使京東淮東宣撫處置使司右

軍統制杜琳降橫行遙郡二官琳擅遣士卒過淮採薪

為敵人掩執以去韓世忠劾之故有是命

乙卯左朝奉大夫主管洪州玉隆觀馮檝守宗正少卿假徽猷閣待制爲國信計議副使檝既罷歸行至鎮江復召檝入對奏疏曰臣嘗謂天下之事有經有權顧所遇如何耳遇經事而可以守常則何以權爲遭變事而斷於有濟烏可捨權而不用焉國家自靖康以來敵人南侵二聖北狩族屬臣民隨寓沙漠宗廟陵寢遙居僞境繼而太上皇帝訃至梓宮未還豈獨陛下羹牆之念造次不忘凡百臣子孰不痛憤昨緣朝廷遣使請上皇

梓宮使還道敵人講和之言從而應之往返通好竊聞  
比有許還地歸梓宮之報然索禮太高朝廷未有所處  
使人躊躇境上而稽於過界道途之議皆云士大夫有  
不可屈之言諸大將有君辱則臣辱之說咸欲奉兵以  
示威臣恐此聲若出萬一有妨和議則機會何時可復  
得耶使金人無還地歸梓宮之意固不敢自屈以奉彼  
如或有之是陛下之屈迺爲父母兄弟宗廟陵寢祖宗  
境土族屬臣民而屈耳爲父母兄弟宗廟陵寢是屈而

行孝弟也為祖宗境土族屬臣民是屈而施仁慈也陛下少降其禮而能返父母兄弟族屬臣民於舊都還祖宗境土於版籍復宗廟陵寢於邦內一舉而兼備孝弟仁慈之四德自古帝王之用心何以加於此乎然所謂屈者豈真我辱哉循斯湏之權耳廼伸之階也會稽之役勾踐屈於吳王卒能破吳鴻門之會高祖屈於項羽卒能興漢然則茲屈也非所以為伸歟假如諸大將不許陛下降禮以就之自非同心協謀一戎衣可以空敵庭

然後上皇梓宮可還太母淵聖鑾輿可復族屬臣民可  
返宗廟陵寢可安臣恐敵廷未易遽空也借能空之兩  
國又須交兵殘害億萬生靈之性命而後底定豈若不  
血一刃而遂如所欲乎臣願陛下毋惑士大夫之言毋  
徇諸將之議斷自淵衷度利多害少則行之儻陛下俄  
頃少降萬乘之尊果得金人草心歸上皇之梓宮還太  
母淵聖之鑾駕返我族屬臣民復我故疆境土則是陛  
下於十有餘年渺茫懷想之中一日之間母子兄弟復

得相見宗廟陵寢復得奉祀族屬臣民復得綏睦臣謂  
累世南面之樂未有如陛下今日之樂也臣所以不避  
忌諱而妄爲陛下陳之雖然自古和不能獨成有威然  
後能成其和而有威其和乃固如專任和而廢威使  
彼以信來夫復何疑其或繼之以詐將何以待之哉臣  
願陛下諭使人篤於講和勅將帥嚴於修備責效於使  
人歸功於將帥降禮以成和議嚴備以固和好如是則  
有萬全之功無不測之患矣上覽疏即日除檄故官與



王倫偕見使人議事

丙辰詔曰朕以眇躬撫茲艱運越自初載痛二帝之蒙  
塵故茲累年每卑辭而遣使不難屈已徒以爲親雖悉  
意於經營終未得其要領昨者驚傳諱問恭請梓宮彼  
方以講好而來此固當度宜而應朕念陵寢在遠梓宮  
未還傷宗族之流離哀軍民之重困深惟所處務適厥  
中既朝慮而夕思又廣詢而博訪言或同異正在兼收  
事有從來固非創議樞密院編修官胡銓職在樞機之

屬分乖廉陞之儀遽上封章肆為克悖初投匭而未出  
已騰藁而四傳導倡陵犯之風陰懷劫持之計儻誠心  
於體國但合輸忠惟專意於取名故茲眩衆閱其淺慮  
告爾多方勿惑胥動之浮言庶圖可久之大計時秦檜  
恐言者不已故白上下此詔以戒諭之 檢校少傅慶  
遠軍節度使郭仲荀提舉醴泉觀仲荀既入見遂有是  
命 尚書戶部員外郎錢觀復罷殿中侍御史鄭剛中  
言觀復性資陰狠臺章頃數論其短執政庇而留之劉

大中喪子觀復隨其柩宿於城外廉耻不立故絀之

丁巳太府少卿耿自求直顯謨閣知常州 軍器監丞

李若虛守尚書戶部員外郎 直徽猷閣提舉華州雲

臺觀汪召嗣知撫州

戊午秦檜奏大金使名未正乞令人與計議改江南為

宋詔諭爲國信如不受封冊不遣泛使皆當先事言之

上曰朕受祖宗二百年基業爲臣民推戴已踰十年豈

肯受其封冊兼畫疆之後兩國各自守境每事不相關

涉惟正旦生辰遣使之外非時不許往來朕計已定

觀文殿大學士提舉臨安府洞霄宮李綱言臣竊見朝廷遣王倫使金國奉迎梓宮往返屢矣今倫之歸與金使偕乃以江南詔諭為名不著國號而曰江南不云通問而曰詔諭此何禮也臣請試為陛下言之金人毀宗社逼二聖而陛下應天順人光復舊業自我視彼則仇讎也自彼視我則腹心之疾也豈復有可和之理然朝廷遣使通問冠蓋相望於道卑辭厚幣無所愛惜者

正以二聖在其域中爲親屈已不得已而然猶有說也  
至去年春兩宮函問既至遣使以迎梓宮亟往遄返初  
不得其要約今倫使事初以奉迎梓宮爲指而金使之  
來乃以江南詔諭爲名責實已自乖戾則其所以罔朝  
廷而生後患者不待語而可知臣在遠方雖不足以知  
其曲折然以愚意料之敵爲此名以遣使其邀求大略  
有五必降詔書欲陛下屈體降禮以聽受一也必有赦  
文欲朝廷宣布班示郡縣二也必有約束欲陛下奉藩

稱臣稟其號令三也必求歲賂廣其數目使我坐困四也必求割地以江南爲界淮南荆襄四川盡欲得之五也此五者朝廷從其一則大事去矣金人變詐不測貪婪無厭縱使聽其詔令奉藩稱臣其志猶未已也必繼有號召或使親迎梓宮或使單車入覲或使移易將相或使改革政事或竭取賦稅或朘削土宇從之則無有紀極一不從則前功盡廢反爲兵端以謂權時之宜聽其邀求可以無後悔者非愚則誣也使國家之勢單弱

果不足以自振不得已而爲此亦無可奈何今土宇之  
廣猶半天下臣民之心戴宋不忘與有識者謀之尚足  
以有爲豈可忘祖宗之大業生靈之屬望弗慮弗圖遽  
自屈服祈求乞憐冀延旦暮之命哉臣願陛下特留聖  
意且勿輕許詔羣臣講明利害可以久長之策擇其善  
者而從之 試尚書禮部侍郎曾開充寶文閣待制知  
婺州先是秦檜嘗因語和議事曰此事大係安危開於  
坐中抗聲曰丞相今日不當說安危止合論存亡爾檜

矍然驚其言而罷遂命出守開辭改提舉江州太平觀

左奉議郎林待聘試太府少卿進士顏師與特補

右迪功郎師與卓兄也上以真卿故官卓等三人卓端

死故改命焉故左中大夫李回再復資政殿學士以

其妻郭氏訟劉大中挾情報怨也兵部侍郎兼權吏部

尚書張燾言回嘗受張邦昌偽命爲執政今來恩命竊

恐公議紛然不允詔劉大中所劾無寔盡還職名依條

與恩澤其從僞一節竦與范宗尹謝克家別取旨秦檜



恨二人不已故因事及之

己未吏部尚書李光參知政事秦檜與光初不相知特以和議初成將揭榜欲藉光名以鎮壓耳上意亦不欲用光檜言光有人望若同押榜浮議自息上乃許之

御史中丞勾龍如淵上疏以振紀綱辨邪正明賞罰謹名器審用度厚風俗去文具七事爲獻詔三省樞密院常切遵守先是有詔觀文殿學士孟庾提舉萬壽觀赴行在如淵入對論庾已試罔功難以更加器使上曰朕

蓋欲遣庾奉使上又厲聲曰在朝莫更有小人如淵曰  
如趙鼎爲相隳盡紀綱乃竊賢相之名而去王庶在樞  
府使盡姦計乃以和議不合賣直而去劉大中以不孝  
得罪亦竊朝廷美職善罷去上曰卿如何不論如淵曰  
今士論見孟庾之召王庶之去已有一解不如一解之  
語願陛下不惜庾一人以正今日公論其他一一容臣  
爲陛下別白之上色稍解翌日以庾知嚴州孟庾初召  
及除日歷

全不見據如淵退朝錄云爾今因如淵上殿附書之以  
事考之必在劉大中未落職之前大中落職在癸亥去

此四日事亦相近也

癸亥秦檜奏呂本中行趙鼎修哲宗史成遷特進詞云謂合奉晉楚之成不若尊王而賤霸鼎爲首相於議和通使未嘗不僉同議論今命詞如此皆鼎風旨欲窺伺和議之不成爲脫身之計上因諭已酉年金人南下之時鼎爲臺臣尚欲與金人畫江爲界當時傳言金國遣使來遂留鼎於四明接伴既而盧伸等自軍中竄來非金使也鼎追見朕於章安鎮當時豈以議和爲非此事

張守備見今守赴江西大帥去尚未還卿可遣書問之

檜曰便可錄此聖語付史館

按日歷又云臣檜等退竊歎上明智照臨洞見臣下

反覆之態  
豈欺我哉

資政殿學士提舉臨安府洞霄宮劉大中

落職以御史中丞勾龍如淵再論其不孝也制曰含齒

之類共知篤於愛親垂髫之童莫不羞稱不孝豈有居

儀刑之重任爲名教之罪人民罔具瞻朕有逸罰大中

頃由過聽擢在要津猥以小才遂當大用志所生之天

屬視厥父如路人爨烟不同寢疾弗問事皆有狀聞者

寒心人誰無親戚所切齒其詞起居郎權中書舍人劉  
一止所作也 尚書駕部員外郎王居修罷殿中侍御  
史鄭剛中論居修緣大臣姻故遽叨郎選故黜之 布  
衣姚舉上書詔賜束帛

甲子詔太府寺丞莫將所上封事通曉世務議論可采  
令閣門引見上殿將之書曰臣竊見近者金使求聘且  
許交河南地界還梓宮歸東朝淵聖皇族議者雜然益  
以爲詐已而見行人過索禮儀又肆臆度之說何衆人

之難曉一至是乎且夙夜以思天之所以純佑陛下無過此舉深慮臆度之說少眩聖意陛下惜一日之屈而隳其初心臣聞中原擾攘無甚於晉方十六國之長雄於中原其相吞滅者皆其族耳苻堅一舉而敗於合肥李靖謂非謝元之善乃苻堅之不善蓋時爲慕容垂所陷也由是言之紛紛者之論謂養吾兵威一舉而足以滅敵者亦不通乎古今之說也孟子曰太王事獯鬻勾踐事吳畏天者也陛下以太王之心行勾踐之策達孝

於父母致恭於兄弟敦睦於九族一舉而悉如吾志此天相陛下之明驗也臣聞興師十萬則不得操事者七十萬家此危道也今日之議成雖未可以去兵而亦可以少休兵矣夫國虛則民貧民貧則上下不親敵攻其外民盜其內是謂必潰此今日四川之事大可慮也今日之議成則兵之戍於外者可以移於近兵之冗於食者可以汰而減興農桑而省饋餉俾四方萬里舉無科抑怵惕之勞顧不可乎今關市重斂商賈不通財貨彫

虛錢寶空乏公私掃地赤立之際也今日之議成費可漸積商可漸通錢可漸增變警擾之習爲阜民歸遷徙之勞爲永業俾城郭郊野舉有還定之安顧不可乎是四事者至易曉也而紛紛之說猶不喻焉蓋亦未之思耳或者又曰無約而請和者謀也早辭而益幣者進也臣應之曰陛下遣使以和請敵以和應非無約而請也使人之來徜徉境上舉止甚高言辭頗倨非早辭也敵以和應出於實矣在我所以自治而待之者何如耳非



譎竒無以息寇非陰謀無以成功臣於此多有說焉使  
獲奉清閑之燕以畢其說非特臣之幸實天下之幸

乙丑詔紹興府南班不帶遥郡宗室十八員歲撥上供  
米五百斛令同判大宗正事士儻均給之以士儻言宗  
室俸薄者不足於糴故也 徽猷閣待制提舉江州太  
平觀錢伯言卒于嚴州

丙寅資政殿學士新知潭州王庶落職提舉臨安府洞  
霄宮時御史中丞勾龍如淵論庶之罪以爲薦用非人

屢遭繳駁而歸罪後省驕蹇自恣不下堂廡而倨見從  
官傾耳側足惟幸王倫不還和議不成使人及境而色  
大沮於是始有求去之請也庶本趙鼎所薦方劉大中  
之去庶已不安鼎之將去庶愈不安變詐百出營救萬  
方謂鼎不逐朝臣爲不成宰相手段交結張戒一日曰  
此子不了得一事及其去也乃敢冒言以和議不合賣  
直而去伏望重行竄削以明庶欺君罔上愚弄天下之  
罪制曰庶大言以惑衆小智以飾姦既陳立異之辭旋

有壞成之意倘謂和戎之非策則雖執義以何慚乃因  
知己之莫由遂欲脫身而邀譽第務死黨寧知有君其  
詞亦劉一止所作也 尚書考功員外郎李彌正禮部  
員外郎高閱並罷御史論彌正閱與修神宗實錄元豐  
之法元祐之政固二事也范冲以元祐史臣之後而膺  
論撰之職則雖曰盡公終亦致疑此趙鼎之失也厥書  
既成閱日已久縱有得失後之作史者尚得而去取之  
必建重修之議此張浚之過也彌正舊校勘官閱爲史

官本非所長者也至趙鼎再相彌正乃以前日之罷爲  
不易逢之機閱以前日之舉爲不得已之事誕謾反覆

以儒濟姦伏望特行罷黜以戒在位故二人並罷

日歷  
直作

臣察上言而有謹按  
字恐是鄭剛中疏

樞密院編修官趙雍上書曰臣

伏見金使到闕朝見之禮彌旬未決宰執臺諫定長久  
之策未得其中意者陛下以梓宮未還母兄在遠急於  
迎見或欲少抑禮節以全大倫此宜羣臣庶民仰體聖  
意克贊孝心何苦立爲異論然中外定分誠不可亂其

禮且金人之禍十五年矣始者我不習兵望風犇潰其  
後民心銜痛願雪國耻淮上屢勝金有懼我死戰之師  
是以去春哭我以上皇之喪今歲示我以豫賊之廢使  
我遭國凶訃則宅憂而弛征伐喜廢豫賊則釋怨而望  
和好皆彼淺近陋隘之術而大臣不能洞照其姦猥相  
與從事於遣使彼得以怠我之事我無以乘彼之隙王  
倫一行使旨屢變反令邀求將見名位紊亂冠履易置  
天傾地覆莫甚於此名號一屈尚可望號令海縣責備

臣節休息盜賊固結人心哉况金人肆禍亘古無比我  
乃憑一介之使忘千百年無窮之耻更欲自屈不知其  
可也周赧王時秦強楚弱楚願和秦約之武關比其至  
也閉關奪之使効藩臣之禮居三年懷王發病卒秦歸  
其喪太子畏秦復娶秦女以和先臣司馬光曰秦之不  
道也殺其父而劫其子楚之不競也忍其父而昏其讎  
彼之給我以渺茫之梓宮劫我以難從之稱號母兄未  
見乃先事讎均之二策孰爲得失乎天子之孝與臣庶

不同報難報之恨雪難雪之耻精變天地誠動金石震  
國威立法制爲匹夫匹婦復讎而朝四夷於明堂此陛  
下之職而羣公所當盡心也若膝一屈則禮經掃地拜  
恩不暇一歲遣使再歲遣使三歲遣使國力大弊所議  
無期費歲月殫財計失人心我之九廟盡在臣妾當是  
之時陛下雖欲長侍母兄度可如意乎爲今日之計當  
以講和爲中國一事不必張皇委宰相平見使者遣使  
臣再議直俟梓宮已還母兄相見然後徐議稱號折中

典禮南北兄弟自有故事願陛下少抑一身孝愛之情

俯循天下至正之論臣不勝甚幸

雍所上疏未得本月且附此或移附金

使入闕之前

丁卯左宣教郎王揚英爲太常博士揚英丹陽人獻所著黼宸箴十二篇上召對而有是命

戊辰國信計議使王倫言金使作詔諭江南四字名目不正秦檜曰須是見得國書恐封冊事非便上曰朕嗣守太祖太宗基業豈可受金人封冊

日歷大臣秦檜奏曰陛下堅守此兩



向臣謹按不受封冊上兩嘗宣諭豈待捨言之日歷成  
於秦燬之手其意欲逃責於後世而妄爲此說爾今不  
取  
倫又言胡銓上書首欲誅臣乞正鼎鑊之罪以弭煩  
言詔倫無罪可待

己巳王倫馮檄同班入對 湖北京西宣撫使岳飛乞  
差胡邦用知靖州上曰郡守牧民之官亦藩屏所寄當  
自朝廷選差若皆由將帥辟置非臂指之勢也

庚午御史中丞勾龍如淵入對先是主管殿前司公事  
揚沂中權主管馬軍司公事解潛權主管步軍司公事

韓世良至都堂見秦檜曰以主上受金書欲行屈已之禮萬一軍民洶洶將若之何退至御史臺以其副上如淵且言今三大將在外它日見責以爾等爲宿衛之臣乃令上行此禮不知何詞以對如淵告以諸公不須爾他日第令計議使取國書納入禁中必不行其他禮數沂中等以手加額曰若得如此天下萬幸如淵具以其言入奏且言今日和議實陛下以徽宗顯肅皇后梓宮與母兄之重在人國中宸心朝夕不遑寧處遂遣王倫

奉使請和今日金人既遣報使賫書而來儻若不受必  
至歸曲于我一日興師彼則有辭此和議固不可壞而  
禮文之間動輒過當若不度利害勉而從之則堂堂中  
國一旦遂爲敵人屈已如臣管見必遣王倫與使人反  
復商議取得敵書納入禁中則禮不行而事定矣上曰

果如此即無以加俟以此而付之

此並據如淵退朝錄  
修入如淵所記又曰

如淵請對條取敵書之策曰昨日三衙揚沂中韓世良  
解潛來見臣云某等昨詣都堂覆宰執說聞官家受敵  
書必欲行屈已之禮萬一軍民洵洵即某等彈壓不得  
有一劄子今將副本來呈中丞此亦非某等生事蓋緣

有大底三箇在外它日問某等云爾等爲宿衛之臣如何却使官家行此禮數不知使某等如何辭對其所說大底三箇蓋謂韓世忠張浚岳飛也此言雖似挾持然亦此事涉大利害誠不可輕議臣告以諸公不須如此他日只是令王倫取敵書納入禁中必不行其他禮數三人者以手加額曰若得如此天下萬幸臣所見惟是令倫早開諭使人取得敵書納入最爲良策

殿中侍御史鄭剛中言今日

之勢尤急於邊郡如楚泗通秦滁濠江鄂以至荆襄關峽之地不過二千餘郡願詔大臣精選二十餘輩分而布之使其招徠牧養朝廷又時遣使按行無狀者易之處處得人則須以持久增勅賜金之事可行矣從之

熊克

小歷繫之庚午  
蓋付出之日也

辛未參知政事李光言諸路月椿最爲民間重害而江  
東西爲甚元降指揮許取撥應干上供封椿諸司并州  
縣等不以有無拘礙上供經制酒稅課利及漕司移用  
等錢椿辦如此州縣尚自應辦不足今江南路漕司往  
往將移用等錢於逐州主管司專委通判拘收不許取  
撥致民不堪命欲下諸路應月椿錢許將諸色錢椿辦  
如有餘方許漕司拘收庶幾隴畝之民不致失業光又

奏今日急務莫切於理財之政有避其名而因失其實者有無其實而徒存其名者未易概舉姑論其大者二事常平之法本出於漢耿壽昌今州縣錢穀有屬常平司者名色非一悉總於戶部右曹今乃以王安石之故而廢之既使香鹽司兼領又別差主管官一員有司莫知適從錢穀因致失陷發運使本以總六路財計以漕輓中都饋餉爲職兵興以來既無輸轉今乃以糴買事委之其本錢無慮五六十萬緡皆從朝廷給降此國用

所以益窘也望罷常平主管官依舊令香鹽司兼領罷發運司其糴買經制等事令戶部侍郎專領庶幾名正而事成官省而職舉秦檜進呈上曰月椿事朕數為趙鼎言之鼎不以為意常平司當復置三省可條具取旨癸酉秘書省著作郎胡珵尚書司勳員外郎兼史館校勘朱松秘書省著作佐郎張廣凌景夏秘書省正字兼史館校勘常明范如圭上書曰臣聞主憂臣辱主辱臣死前者上皇訃聞陛下方宅大憂天下受其辱矣今者

聞諸道路口語籍籍審如此是將辱在陛下之身臣等  
得其死為有名之時也人誰無死為君父死之為有宋  
宗社死之為古今臣子忠孝大訓死之豈為無名乎或  
難臣者曰彼將歸我淵聖皇帝歸我天枝之族屬歸我  
中原之故地重質以要我大義以動我是國人顒顒望  
之十年而未致者曾無亡矢遺鏃之費一朝而獲雖使  
主上為是一稽顙屈膝馬宜無所愛也豈與夫新垣衍  
帝秦倉猝之謀張儀捭闔之論同日道哉臣曰固也昔



者劉項相持滎陽成臯之間嘗置太公狙上約高祖降  
矣爲高祖者信其詐謀而遽屈則分羹之語不敢出諸  
口而天下亦非劉氏有矣唯高祖不信不屈日夜思所  
以圖楚者而上下戮力焉故至於漢有天下大半諸侯  
皆附楚兵疲食盡而割鴻溝東西之約自至太公呂后  
自歸故敵不至於窮蹙敗亡之迫而與我連和者古無  
有也臣聞四太子者方據汴都晏然撫有中原之民關  
輔淮楚之備未始一日徹而戍卒各不下數萬未有可

圖之釁彼亦何憂何恐而一旦無故與我連和幡然若  
是何爲也哉顧易曉爾彼狃夫薦食之威動則得志而  
我甚易恐故喜爲和之說以侮我又慮我訓兵積粟蓄  
銳俟時而事有不可測知者故不得不爲和之說以撓  
我中國民力日就困竭而敵使之至無已時蓋坐弊敵  
國疲於奔命無出此計者不憚一費而獲永寧猶之可  
也今年秋如是矣冬又如是矣明年又如是子產之言  
曰用幣必百兩百兩必千人幾千人而國不亡臣所不

忍聞也殫竭膏血以養驕惰之兵屯戍不用爵其憤憾  
緩急則曰講和講和使此輩一旦藉口而召亂將何以  
弭其變哉故臣嘗謂秦之衡人金之和使兵家用一勝  
百之術也六國不悟衡人割地之無饜故至於社稷不  
血食國家不悟敵使講和之得策其禍亦可勝道哉而  
况敵人虞詐所從來久時時備禦猶懼或不免也而乃  
嗜其甘言信之不惑其料事亦踈矣彼以和之一字得  
志於我十有二年矣以覆我王室以弛我邊備以竭我

國力以解體我將帥以懈緩我不共戴天之讎以絕望  
我中國謳吟思漢之赤子奈何至今而猶未悟也陛下  
躬曾閔之行受敵人之侮不過曰使獲伸東朝一日之  
養於天下是亦足矣遑恤其他信如道路之言則敵人  
之要我至不遜也至無稽也是坐而約降我也艱難以  
來彼苟可以毒我者無遺力矣獨欠約降一事爾今不  
慮而從之且梓宮何在在境已乎母后何在淵聖皇帝  
何在皆在行已乎中原故地版圖何在在使者所已乎

陛下奈何不顧祖宗社稷二百年付託之重將不慮而從之以萬乘之尊冒險而僥倖彼敵人者苟或濟其不遜無稽之謀而蹂躪以逞將焉避之哉劉豫之監甚未遠也當是時累百王倫何補救敗之際而倫之在金爲功臣矣可得而追戮哉子思曰人主自臧則衆謀不進事是而臧之猶卻衆謀况未必臧乎故曰聖人甚禍無故之利不可不察也臣等疎遠小臣然於行在與備一官司之列坐糜廩粟無以報大賜情迫理極義不愛身

冒雷霆甘俟斧鉞臣等無任惶懼激切屏營之至如  
主又言臣竊謂徽宗顯肅之靈母后淵聖之意所以眷  
眷焉庶幾得歸者以陛下身為皇帝有國有家故也陛  
下不顧安危輕身以從讎則我國家將為讎敵所有陛  
下雖欲求措身之所且不可得梓宮輦輅其將安歸女  
真自以於陛下為不共戴天之讎雖陛下未能即日報  
復寧不慮陛下他日終為之害乎其所以揚言欲以梓  
宮母后淵聖悉歸於我者豈誠然哉是欲以計取陛下

而除己之害爾陛下縱不愛身柰宗廟何柰梓宮皇太后何柰淵聖何今女真之使以詔諭江南爲名要陛下以稽首之禮自公卿大夫以至六軍萬姓莫不扼腕忿怒豈有聽陛下北面而爲仇敵之臣哉萬一陛下拂天下之情屈身於敵意外之患有不可勝言者矣陛下勿謂屈一己便可以得女真之歡心彼其無厭之求寧有窮已設若擁梓宮而南邀六飛奉迎于境或強吾母后淵聖爲手書以召陛下會于大河之北或欲易吾之將

相去其所惡而用其所愛又欲使其腹心之臣來預吾  
之政事如監于方伯之國者又欲使吾散遣戍卒之兵  
平治險隘以利其戎車能從之乎凡此數者一有不從  
忿怒之兵必不旋踵而至豈如今日痛憤肝膽之際明  
諭敵使而謝遣之然後詔在廷之臣與守邊之將講明  
戰守之策日夜飭厲常若臨敵表裏江淮必足以防侵  
軼之患矣願陛下枕戈嘗膽深思此策而力圖之則梓  
宮終有山陵之期母后終有東朝之養淵聖終免鴿原



之難陛下終得遂孝悌之心而天下臣子亦得伸眉吐  
氣食息世間俯仰無所愧怍與夫忍耻事讎榮辱禍福  
相去萬萬矣時士大夫皆以和爲不可而如圭與王庶  
曾開戶部侍郎李彌遜監察御史方庭實言之尤力

庭實奏疏未得本  
當訪求增入之

彌遜

甲戌端明殿學士提舉萬壽觀韓肖胄以舊職簽書樞  
密院事

乙亥以韓肖胄爲大金奉表報謝使光山軍承宣使樞密

副都承旨錢恂副之 武功大夫和州防禦使江南西

路馬步軍副總管兼統制本路屯駐軍馬賈和仲罷以

參知政事李光劾其輕佻妄作也

丙子金國詔諭使尚書右司侍郎張通古明威將軍簽

書宣徽院事蕭括至行在言先歸河南地徐議餘事以

左僕射府館之 監察御史施庭臣爲侍御史庭臣抗

章力贊和議故有是除

胡元質成都丁記施庭臣除侍御史入謝自陳在朝無援不自

意蒙親擢至此太上曰卿勾濤所薦弗以相命下中外語耶此與張燾劫疏所云全不同今不取

駭愕 詔左朝奉大夫沈該選人陳懋上書可採懋改  
合入官談令閣門引見上殿以談獻書言和議也 兵  
部侍郎權吏部尚書張燾言陛下信王倫之虛詞發自  
聖斷不復謀議便欲行禮羣臣震懼跼踖措仰惟聖  
孝通於神明固可使仇敵革心惟我之聽然必已得梓  
宮已得母后已得宗族乃始可議彼此通好經久之禮  
今彼特以通好爲說意謂割地講和而已凡陛下之所  
願欲而加於聖心者當是時也在廷之臣莫能正救曾

魯仲連之不如豈不獲罪於天下萬世乎爲臣如此何以生爲臣是以不避鈇鉞之誅再干天聽伏望陛下俯詢輿情稍寬聖慮毋務欲速緩以圖之天下幸甚 御史中丞勾龍如淵右諫議大夫李誼殿中侍御史鄭剛中請至都堂與宰執議事初如淵既見上陳取敵書之策後數日但聞朝論決欲行屈已之禮軍民時出不平之語聞之有可駭者上自大臣下至百執事朝夕惴惴恐此禮一行或生意外之變闔城百姓有終夕不能寤

者而近甸常潤會稽之間民悉不安於是入奏同誼請  
對又呼臺吏問朝廷有大議論在法許臺諫見宰執商  
議否曰有如淵取法視之果然乃入奏即日有旨並許  
之此據如淵退朝錄修入徐夢莘北盟會編云張通古  
來時上與秦檜已議定而朝臣猶未僉諧通古要與  
人主抗禮又欲上面拜金國之詔議  
未定故通古在館多日未得引見

丁丑詔大金遣使前來止爲盡割陝西河南故地與我  
講和許還梓宮母兄親族餘無須索慮士民不知妄扇  
惑令尚書省榜諭起居郎劉一止試中書舍人司農

寺丞莫將賜同進士出身除起居郎將入對遂有是命  
都省翻黃下吏部試兵部侍郎兼權吏部尚書張燾試  
吏部侍郎晏敷復言仰惟陛下聖孝天至痛梓宮之未  
還念兩宮之未復不憚屈已與敵議和夙夜焦勞誠心  
懇切孜孜汲汲惟恐後時特以衆論未同故未敢輕屈  
爾幸而日者上自朝廷下逮百執之臣小大一心無復  
異議朝夕進退從容獻納庶幾天聽可回卒不致屈此  
宗社之福也彼施廷臣乃務迎合輒敢抗章力贊此議

姑爲一身進取之資不恤君父屈辱之耻曩寔定罪殆不容誅乃由察官超擢柱史夫御史府朝廷綱紀之地而陛下耳目之司也前日勾龍如淵以附會此議而得中丞衆論固已嗤鄙之矣今庭臣又以此而躋橫榻一臺之中長貳皆然既同鄉曲又同腹心惟相阿附變亂是非豈不紊國家之綱紀蔽陛下之耳目乎衆論沸騰方且切齒而莫將者又以此議由寺丞而擢右史如淵庭臣庸人也初無所長但知觀望而將則姦人也考其

平昔奚所不爲陛下奈何遽與此輩斷國論乎詩曰憂  
心悄悄愠于羣小孔子曰小人成羣斯可愠也今如淵  
庭臣將輩漸已成羣豈國家之福哉伏望睿斷幡然而  
改特加斥逐庶幾少杜羣枉之門天下幸甚至於議和  
則王倫實爲謀主彼往來敵中至再四矣陛下所倚以  
爲腹心而信之如著龜者也今其爲言自己二三事之  
端倪蓋亦可見更爲陛下仰念祖宗付託之重俯念億  
兆愛戴之誠貴愛此身毋輕自屈但務雪耻以思復讎



加禮其使厚資遣發諭以必得事實之意告其國人皆  
曰不可之狀使彼悔禍果出誠心惟我所欲盡歸于我  
然後徐議所以報之之禮似未晚也如其變詐將復誘  
我以虛辭則是包藏終不可測便當勵將士保疆場自  
治自強以聽天命以俟天時天時既至何爲不成何求  
不得伏願陛下少忍而已所謂自強之策豈有甚高難  
行之論特患陛下不爲而已君臣上下協力一心定爲  
規模一新庶政安往而不得哉矧我將士浸皆可用比

之往年氣已數倍萬一未能進取以之自守蓋有餘矣  
釋此不爲甘心卑辱之事臣竊惑之仰惟陛下脫身艱  
難苦厄之中保有國祚一紀于茲其所恃者不在人心  
乎自朝廷有屈已之議上下皆已解體儻遂成屈已之  
事則上下必至離心人心既離何以立國伏願陛下戒  
之重之臣世受國恩身參法從不敢自同衆人是用輒  
敢盡言夫言而犯雷霆之怒罪固當死不敢救正而使  
陛下受屈辱之耻罪亦當死所有施庭臣莫將除命更

合取自聖旨指揮一止亦言將丞九列驟綴從班人以  
爲將上書附和議而得之臣之誤恩與將同制臣若不  
言人必以臣自爲地而不忠乞併臣罷之於是將庭臣  
皆不敢拜時燾既力詆拜詔之議秦檜患之燾亦自知  
言切恐得罪遂托疾在告檜使給事中兼權直學士院  
樓炤諭之曰北扉闕人上欲以公爲直院然亦使途耳  
公疾平宜早出燾大駭曰果有是言愈不敢出矣燾乃  
不主和議者若使草國書豈能曲徇意指哉燾嘗思之

不過一去今日之事其去在我一受遷官他日以罪去

則事由人矣檜不能奪遂止

按張燾行述所載執奏施庭臣等除命事與晏敦復

行狀全同而魏扶之諫議以此奏爲燾所作是時燾以兵侍兼權吏書而敦復爲左選侍卽以事考之則二人

同上

是日臺諫官勾龍如淵等再詣都堂議國書事

秦檜曰若王倫商量不聽則如之何如淵曰正恐倫未能辦此亦嘗率易入文字請相公叅政親見使人與議庶國事早濟李光曰此固不可憚第一至館中遂有如許禮數如淵曰事固如此然視人主之屈則有間矣光

默然遂召國信計議使王倫副使馮楸至都堂如淵語  
倫曰公爲使人通兩國之好凡事當於敵中反覆論定  
安有同敵使到此而後議者倫泣且曰倫涉萬死一生  
往來敵中者數四今日中丞乃責倫如此檜等共解之  
曰中丞無它亦激公使了取書事耳倫曰此則不敢不  
勉戊寅如淵與李誼入對上曰士大夫但爲身謀向使  
在明州時朕雖百拜亦不復問矣上辭色俱厲如淵曰  
今日事勢與在明州時不同誼曰此事莫須召三大將

來與之商議取其穩當乃可上不答久之曰王倫本奉使至此亦持兩端秦檜素主此議今亦來求去去則無害它日金人只來求朕豈來求秦檜二十七日已卯上召倫入對責以取書事是晚倫見使人商議以一二策動之使人惶恐遂許明日上詔宰執就館見使人受國書納入人情始安或曰時欲行此禮宰臣秦檜未有以處因問給事中炤炤舉書諒陰三年不言之句以對檜悟於是上不出而檜攝冢宰即館中受書以歸敵使始

知朝廷有人此聞之王師愈

此並據如淵退朝錄脩入

如淵又言講

和之事繫國利害禮文之間所當商榷其如大議蓋已  
素定初不待道塗之言而決也沈該輕儇俗子素無循  
行近因上書亦蒙召對深慮希進之人迎合聖意自此  
妄有陳獻乘時獵取官職有紊紀綱爲害不細望賜寢  
罷先是張燾晏敦復因論施庭臣莫將除命亦言該駐  
吏不當由冗散召對至是遂寢 尚書右司員外郎范  
同直寶文閣提點兩浙東路刑獄公事從所請也

已卯吏部侍郎晏敦復戶部侍郎李彌遜梁汝嘉兵部侍郎兼史館修撰兼權吏部尚書張燾給事中兼直學士院樓炤中書舍人兼資善堂翊善蘇符權工部侍郎

蕭振起居舍人薛徽言同班入對

按此時兵部侍郎吳表臣館伴新除中書

舍人劉一止權禮部侍郎尹焞起居郎莫將未上故從官止此

上奏曰臣聞聖人與衆

同欲是以濟事自古人君施設注措未有不以從衆而成違衆而敗者伏見今日屈已之事陛下以爲可士大夫不以爲可民庶不以爲可軍士不以爲可如是而求



成臣等竊惑之仰惟陛下獨以爲可者謂梓宮可歸也  
淵聖可還也母后可復也宗族土地可得也國人不以  
爲可者謂敵人素多變詐今持虛文以來而梓宮未歸  
淵聖未還母后未復宗族土地未得何可遽爲卑辱之  
事此公論也以陛下聖孝固無所不盡然天下公論又  
不可不從使天誘其衷敵果悔禍惟我之從而梓宮已  
歸淵聖已還母后已復宗室土地皆已得之則兩國通  
好經久之禮尚有可議豈有但信其虛辭一未有所得

而遂欲屈膝以從之乎一屈之後將舉國以聽之臣等  
恐彼之所許未必可得而我之爲國日賸月削遂至不  
可復支矣臣等竊聞敵使入境伴使北向再拜問敵帥  
起居此故事也然軍民見者或至流涕夫人心戴宋如  
此雖使者一屈猶爲之不平况肯使陛下不顧羣議斷  
而行之萬一衆情不勝其忿而王雲劉晏之事或見於  
今日陛下始有追悔之心恐已晚矣傳曰衆怒難犯專  
欲難成合二難以安國危之道也臣等職在論思竊聞

輿議不敢緘默伏望聖慈俯同衆情毋遂致屈而緩圖  
之不勝幸甚上覽奏愀然變色曰卿言可謂納忠朕甚  
喜士大夫盡忠如此朕必不至爲敵所紿方且熟議  
若決非詐僞然後可從如不然當拘留其人再遣使審  
問虛實燾等頓首謝奏燾所草也 新除權禮部侍郎  
兼侍讀尹焞言臣伏見本朝兵革之禍亘古未聞我國  
無人致以擾亂昨者城下之戰詭詐百出二帝北狩皇  
族播遷宗社之危已絕而續陛下即位以來十有二年

雖中原未復仇敵未殄然而賴祖宗德澤之厚陛下勤撫之至所以億兆之心無有離異遠近愛戴國勢可保設若人心輕搖豈至今日前年徽宗皇帝寧德皇后崩問遽來莫究不豫之狀天下之人痛心疾首而陛下亦且屈意降志以迎奉梓宮請問諱日爲事遂使敵意益驕謂我無人乃再啟和議於今日意欲潛圖混一臣妾中國陛下必爲此議則人心自去祖宗積累之業陛下十二年勤撫之功當決於此矣不識陛下亦嘗深謀而

熟慮乎抑在廷之臣不以告也臣觀陛下所以不顧衆  
說力求和好者不過謂梓宮未還母兄宗族在人掌握  
不知敵人之情專尚姦詐敵人之求無有紀極坐竭帑  
藏歛及百姓感動人心沮喪士氣異時悔之固無及已  
禮曰父母之讎不與共戴天兄弟之讎不反兵今陛下  
方將信仇敵之譎詐而覲其肯和以舒目前之急豈不  
失不共戴天不反兵之義乎又况使人之來以詔諭爲  
名以割地爲要欲與陛下抗禮於庭復使陛下北面其

君則是降也非和也今以不戴天之讎與之和且猶不可况實降乎臣竊為陛下痛惜之或以為金國內亂懼我虜已故為甘言以緩王師儻或果然尤當訓飭號令申嚴賞罰鼓士卒之心雪社稷之耻尚何和之為務時近臣皆入燔以疾固辭新命乃上此疏及移書秦檜言今敵使在廷天下憂憤若和議一成彼日益強我日益怠則中國號令皆從敵出國事廢置皆從敵命侵尋腠削天下有生靈塗炭之憂讒間疑貳將帥有誅戮奪權

之害姦究生心大勢奈何將見敵人坐收成功相公被天下之責無所歸咎願相公從容榻前力陳大計以謂敵人與我有不戴天之讐靖康以來屢墮其術今若一屈使為口實賈怨誨兵自困自斃豈真忍為此議比者竊聞主上以父兄未返降志辱身於九重之中有年矣然亦自是未聞敵人悔過還二帝於沙漠繼之梓宮崩問不詳天下之人痛恨切骨則敵人貪噬之性不言可見天下方將以此望於相公覲有以草其已然豈意為

之已甚乎今之上策莫如自治自治之要內則進君子而遠小人外則賞當功而罰當罪使主上之孝悌通於神明道德成於安強勿以小智子義而圖大功不勝幸甚檜得其書已不樂讀至小智子義之語乃大怒之

庚辰尚書右僕射秦檜見金國人使於其館受國書以歸前一日從官既對上召王倫責其取書事倫見北使

張通古以一二策動之通古亦恐遂請明日

此據勾龍如淵退朝

錄或曰時欲行此禮檜未有以處因問給事中直學士



院樓焯焯舉書高宗諒陰三年不言之句以對檜悟於

是上不出而檜攝冢宰受書

此據熊克小歷 按以上二條前三日丁丑勺龍如

淵議國書時已約畧載入此處又為記通古允授國書緣起故複及之

通古猶索百官備

禮迎其書檜乃命三省樞密院使朝服乘馬導從

趙姓之遺

史云金人遣張通古來要上北面拜詔朝廷議未定或請列祖宗御容而置金人詔書於其中拜之至於紛紛不定者累日通古索備玉輅迎詔書百官導從至是猶未決秦檜獨主其事坐於待漏院中置玉輅於殿門之外命三省使服銀緋服綠樞密院使服紫腰金魚赴館候使人出則或導或從使人以為百官也日高通古等始出館馳馬入殿門有親事官一人拽馬羈敵使藤杖擊其首傷竟不肯放通古所持詔其詞不遜上皆容忍

之錫賚通古等極厚時上特以皇太后故俯從敵約而檜必欲屈

已天下咎之

紹興講和錄載金人國書畧云向者建立大齊本以休兵欲期四方寧謐奈何八年

之間未能安定有失從來援立之意於是已行廢黜况興滅國繼絕世聖人所尚可以河南之地俾為主云云今畧擬取附見或削去亦可中興聖政何備龜鑑彼秦檜何人也再入相位投置張浚而不之救搖撼趙鼎而不知恤同已和議者用背已言戰者斥戊午集議問之廷臣廷臣以為不可問之將臣將臣以為不可上自宰執下至侍從臺諫內而卿監郎官外而監司郡守皆以為不可王倫妄誘金使移書悖慢且以詔諭江南為名是欲臣妾我也而吾國舍垢茹耻畧不知校澹庵胡公至欲揭檜首於藁街而新州之行志士飲氣他日韓世忠有伏兵洪澤劫金使以壞和之謀晏敦復不以身計誤國有到老愈辣之性竟亦不能以沮成說也范如

圭有曰擒不病狂奈何爲此擒蓋亦知所反矣夫以盈  
庭分議竟不能奪一擒之議者其爲說亦有二焉其一  
則倡孝悌之說足以動人主之聽其二則立三日思慮  
之言有以堅人主之心嗟夫秦擒倡和議而藉口于孝  
悌是以蔡京欲行紹述而借繼志述事之說無異也秦  
擒欲議之不搖而要君以三日思慮是與安石欲行新  
法而要君以講學術之說無異也然而天聽俯順羣議  
莫移蓋亦有說云耳彼諸公之疏謂梓宮不可還而梓  
宮之還日矣太后不可復而太后之復有期矣陝西  
河北之地不可得今可得矣謂敵不足信今可信矣此  
檜所肆行而無忌憚也孰知尼瑪哈達蘭之姦計哉彼  
以陝西歸我正所以分吾川蜀之兵力也以河東歸我  
正所以斃我東南之事力也我以艱難理之彼遲以數  
年而收拾之猶外府也何其不慮及此耶呂中大事  
記建炎之初內有網外有澤此可爲之一機也而汪黃  
以主和失之紹興之間內有鼎外有浚此又有爲之一

機也而秦檜以主和失之失此二機天地之大義不立  
使我高宗抱終天之痛可勝惜哉蓋嘗大臣任事者張  
趙朱呂數人惟浚在外鼎在內至公血誠相與扶持此  
義然浚終始主戰鼎始主戰終主守則鼎之規模已與  
浚少異若願浩勝非雖內有平賊之功而外但為避敵  
之謀則皆不知此義者也大将用命者張劉韓岳數人  
張浚謂諸大将將惟飛世忠可倚大事而二人必欲掃強  
敵壞和議則真知此義若光世之沉酣酒色不喜恢復  
每每退屯而俊不受行府之命不與劉錡共功不與世  
忠同謀但與沂中為腹心以附秦檜之和議而已則皆  
不知此義者也是則諸臣之不知義者多矣而南渡百  
年公論獨切齒於一檜者何也蓋汪黃壞之於事勢未  
定之時而檜壞之於事機垂成之日為可恨也諸公之  
言和者依違於其間而檜獨斷然為南自南北自北之  
說也他相或一年或二年或不數月而檜獨相二十年  
之久也方其入相之初朝士皆動色相賀惟晏敷復目

之為姦人然向子志於紹興之初與胡安國論曰與檜  
同時被執軍前鮮有生者獨檜盡室而歸非大姦能如  
是乎當時安國猶以為忠其子寅猶以子志之言為過  
則檜之奸可以欺賢人君子也如此方檜之初主和曰  
我有二策可以聳動天下今無相不可行及再主和曰  
臣恐亦有未便欲望更慮三日又三日曰臣恐別有  
未便知上意堅確不移乃乞決和議不許臣下干預則  
檜之奸足以欺聖主也如此檜雖以和議斷自聖衷而  
人心公議終不可遏爭之者臺諫則張戒常同方庭實  
辛次膺侍從則梁汝嘉蘓符樓炤張九成曹開李燾晏  
敦復魏矜李彌遜即官則胡垵朱松張廣凌景夏宰執  
則趙鼎劉大中王庶舊宰執則李綱張浚其他如林李  
仲范如圭常明許訢潘良貴薛徽言尹焞趙雍王時行  
連南夫汪應辰樊光遠交言其不可大將岳飛世忠亦  
深言其非計而胡銓乞斬王倫秦檜孫近二疏都人喧  
騰數日不定人心亦可知矣諸公之議憤激懇切而終

不足以折撻者則有說矣謂梓宮不可還今還矣謂太后不可復今復矣謂陝西河南之地不可得今可得矣謂敵不可信今可信矣此撻之所以能排衆議也然不能復讎雪耻而使吾君抱終天之痛以為孝悌不能自復土宇而乃乞丐於仇讎以立國家此如圭所謂相臣以為忠而不知身陷於大不忠主上以為孝而不知身陷於大不孝樊光遠所謂金人詭詐不足憂而信實深可懼其可信愈甚則其可懼愈甚皆至論也一人之私不能以勝千萬人之公雖撻亦未如之何也

辛巳御史中丞勾龍如淵言今和議已定將遣某使又將遣某使自時厥後歲必再三而使者冠蓋益相望於途矣欲望特詔有司檢照近年體例參酌中制將所得

恩例凡使者在館及至界首者比舊減三分之二汴京  
或燕中者減半直至金國者全破庶幾久而可行詔三  
省樞密院照會

是月尚書吏部員外郎王次翁試祕書少監

日歷無此  
今以本省

題名  
附入

虛恨蠻王歷階犯嘉州忠鎮寨執寨將茹大猷

以歸虛恨乃烏蠻之別種所居高山之後夷人以高爲  
虛以後爲恨故名焉其地東接馬湖南抵邛部川北接  
中鎮地方三百里墟落數十天禧以前朝廷歲以酒食

獨勞嘉祐間始入寇遂徙寨於陽山江北以避之紹聖  
間乞於嘉州博易不許至是遣其徒來忠鎮寨爲漢人  
所殺蠻益讎恨有判官田二二本新津縣吏也亡命蠻  
中常恚歷階爲邊患遂舉族入寇轉掠忠鎮十二村民  
殆盡 鄜延既陷第六將李世輔爲金右副元帥宗弼  
所喜累遷知同州及敵廢僞齊世輔乃與其徒王世忠  
胡遇等潛謀遣使臣白彥忠等持書抵川陝宣撫副使  
吳玠使出兵爲外應是冬左監軍薩里干自大同之陝



西見左都監布爾噶蘇議割地事薩里罕每過都邑必須  
使將吏妻女侍飲世輔忿之比過同州世輔乃偽稱足疾  
伏兵州廨因搗其從者醉而悉殺之遂縛薩里罕上馬  
欲以南歸敵騎追及之世輔與親校崔臯托卜忠等數  
十人決圍而出且戰且前至五交原追騎益衆世輔謂  
曰迫我急即急殺之矣故敵騎尾而不迫世輔度衆寡  
不敵乃解薩里罕縛折箭爲誓縱之使去時洛水溢世  
輔無舟不得渡敵人又會兵斷其歸路世輔遂奔夏州

其父同州觀察使永奇及其家百餘人皆為敵所族世

輔清澗人也

徐夢莘北盟會編云世輔與知華州王世忠謀歸朝為其下告變於珠赫貝勒世忠

被殺金人西元帥薩里罕來同州謀殺世輔世輔伏兵州解執薩里罕率兵走半塗薩里罕說世輔曰欲執我何往也世輔曰往江南歸大宋耳薩里罕曰若往江南南與大金和議大金以河南之地許歸江南江南喜於得地講和必送我歸本國汝則被害矣世輔曰何以信薩里罕乃於近體褚衣中取出一文字即金國主密發來退地之文世輔信之遂暫放薩里罕令去世輔出奔為金人所追且行且戰其下皆盡金人遂殺世輔一家親屬此所云與諸書差不同但夢莘繫今年五月更須參考世輔行述稱薩里罕召公計事公疑不利於已移疾不往薩里罕怒領兵數百人欲以掩公以張滙

節要考之薩里罕是行因見布爾噶蘇計事非掩世輔  
而出蓋行述容有潤色也行述又稱世輔與薩里罕折  
三箭爲誓令翼二聖還疆土  
及毋殺同州之民今不盡載

是歲四川制置使胡世將即成都潼川府資普州廣安  
軍創清酒務歲收息錢四十五萬緡舊成都酒務許

人戶買撲分認歲課爲錢四萬八千餘緡建炎三年額趙開

行隔槽法所增至十四萬六千餘緡紹興元年額及世將改

爲官監所入又倍自後累益增加至五十四萬八千餘

緡紹興二十五年數而外邑及民戶坊場又爲三十九萬餘緡

淳熙二年數於是隔槽之法已壞諸郡漸變爲官監而民戶坊場率以三年一榜賣公私俱困矣

建炎以來繫年要錄卷一百二十四

建炎以來繫年要錄卷一百二十四金人地名考證

尼瑪哈

原書作黏罕  
誤改見卷一

達蘭

原書作撻辣  
誤改見卷一

薩里罕

原書作撒離喝  
誤改見卷十一

布爾噶蘇

原書作拔束誤  
改見卷二十八

珠赫貝勒

原書作折合字董  
誤改見卷三十七

--	--	--	--	--	--	--	--

欽定四庫全書

建炎以來繫年要錄卷一百二十五

宋 李心傳 撰

紹興九年

歲次己未金熙宗亶天眷二年時己未定都臨安故自此歲首不書上所在春正月

壬午朔詔大金已遣使通和割還故地應官司行移文字務存兩國大體不得輒加詆斥布告中外各令知悉

癸未新除起居郎莫將試司農卿充伴送使 侍御

使施庭臣守起居郎

庭臣之制有云爾抗忠不回見義能勇此時蘇符劉一止並為舍人

未知何人所行也

詔英州羈管人傅雱許自便以雱建炎初首請出使故也雱坐孔彥舟故流竄者凡七年

乙酉左通直郎新監昭州鹽倉胡銓簽書威武軍節度判官廳公事宰相秦檜參知政事孫近言銓昨上書思慮有所不及言語過當不足深責兼書中專詆臣等若不陳乞稍加甄叙則是臣等身為輔弼區區與小官校曲直失大臣體故有是命

丙戌以金人來和大赦天下赦文曰乃上穹開悔禍之



期而大金報許和之約割河南之境土歸我輿圖戢宇  
內之干戈用全民命給事中直學士院樓炤所草也應  
河南新復路分見任文武官各安職守並不易置山寨  
土豪等優與推恩應陝西掌兵官昨緣撫御失宜致有  
離散非其本心今來既已歸還各仰安職應進士諸科  
曾因劉豫僞命得解者並與理為舉數應新復州縣放  
免苗稅三年差徭五年應兩淮荆襄川陝新舊宣撫使  
及三衙管軍並特取旨優異第賞統兵官等第推恩內

外諸軍並與犒設張邦昌劉豫僭號背國原其本心實非得已其子孫親屬並令依舊參注無官者仍許應舉軍興以來州縣失守投降之人不以存亡並與叙復子孫依無過人例靖康圍城偽命及因苗傅劉正彥名在罪籍見今拘管編置者並放逐便未經叙用者與收叙紹興八年特奏名進士試入第五等人並特依下州文學恩例江浙諸路今年和預買紬絹每匹特免一貫文江西湖廣等路見有盜賊嘯聚去處並許自新前罪一

切不問

日歷全不載此赦書條件  
今以紹興請和錄修入

端明殿學士提舉

臨安府洞霄宮徐俯上表賀曰禍福倚伏情偽多端恐未盡於事幾當復勞於聖慮湖北京西宣撫使岳飛表曰救輒急而解倒垂猶之可也欲長慮而尊中國豈其然乎又曰謂無事而請和者謀恐卑辭而益幣者進願定謀於全勝期收地於兩河唾手燕雲終欲復讎而報國誓心天地尚令稽首以稱藩飛幕客左承務郎張節夫之丈也秦檜讀之大怒行營右護軍都統制吳玠時

兼知熙州其幕客擬為表以賀璘愀然曰在朝廷休兵  
息民誠天下慶璘等叨竊不能宣國威靈亦可愧矣但  
當待罪稱謝則可客謝不及 責授祕書少監張浚在  
永州見議和詔書移書參知政事孫近大畧曰魯仲連  
不肯尊秦為帝且云連寧有蹈東海而死蓋知帝秦之  
禍發遲而大况我至讎深隙迺欲修好而俸目前少安  
乎異時歲幣求增而不已使命絡繹以來臨以至更立  
妃后變置大臣起罷兵之議建入覲之謀皆或有之矣

浚是以伏讀詔書不覺戰汗幸公深思密以啓沃又以書抵參知政事李光論之 龍圖閣學士提舉醴泉觀

王倫賜同進士出身除端明殿學士同簽書樞密院事充迎奉梓宮奉還兩宮交割地界使榮州防禦使知閣門事藍公佐為宣州觀察使副之許歲貢銀絹共五十

萬匹兩

此據明年五月丁酉詔書附入

倫公佐及報謝使副韓肖胄錢

恧各官其家二人賜裝錢有差

王倫等與恩澤裝錢在是月庚寅

戊子上謂大臣曰祖宗陵寢久淪異域今故地既歸便

當遣宗室使相與近臣偕往修奉遂命光山軍節度使  
開府儀同三司判大宗正事士儂與兵部侍郎張燾俱  
行先是秘書省正字范如圭轉對言兩京版圖既入則  
九廟八陵相望咫尺而朝修之使未遣何以仰慰神靈  
下遂民志上悽然曰非卿不聞此言遂命遣使秦檜以  
如圭不先白已始怒之熊克小歷稱校書郎范如圭蓋  
誤如圭明年二月方遷校書士  
儂等受命在庚寅克  
於丁亥書之亦誤寶文閣學士知廣州連南夫上  
封事曰臣竊惟大金素行欺侮比年以來兩國皆墮其

術中大概彼以和議成之此以和議失之今陛下果推赤心信之以其割河南之地遂思之乎臣知陛下知幾有不信也何以言之丙午之禍父兄母弟六宮九族咸被驅擄逮今十四年辱莫大焉使太上聖躬無恙隨所割地全而歸之十四年羈縻隔絕之恨念之猶且心折得梓宮猶不足為恩得土地顧何足以為恩乎况陛下於太上有終天之別於大金有不戴天之讐方且許還河南之地許還梓宮許還淵聖六宮彼其計實老子所

謂將欲取之必姑與之兵法所謂不戰而屈人兵之術也誰不怒髮衝冠握拳嚼齒而痛憤哉借使盡得所許彼何加損漢王語呂后曰使趙王有天下顧少乃女乎臣竊恐陛下天性孝弟方感其恩遂無赫怒整旅之志盖用心不剛則四肢委靡將士雖欲斷髮請戰有不可得誰為陛下守四方者是陛下十有餘年寵將養兵殫財曲意之計一旦積於空虛不用之地倒持太阿交手而付之矣昔太祖皇帝之南征也李煜遣其臣徐鉉朝



於京師鉉曰煜以小事大如子事父未有過失奈何見  
伐太祖曰爾謂父子為兩家可乎安知大金之計不出  
於此乎豈吾太祖行之而陛下不悟者乎伏讀正月五  
日赦文曰戢宇內之干戈又奉聖旨不得詆斥大金如  
此直墮其術中使忠義之士結舌而不得伸忠良之將  
縮手而不為用范增之語項王曰天下大定矣君王自  
圖之可不鑒哉臣聞張良為漢王借前箸以籌撓楚權  
之謀為漢王不能制項王死命遽欲效武王休馬息牛

具陳天下游士各歸事其主陛下誰與取天下審如詔  
旨臣恐將士解體魚潰獸散如張良所謂誰與取天下  
者然則計將安出或謂彼國新主厭兵乃有此議臣謂  
使其果有厭兵之心正當乘其懈而擊之如其不然先  
發制人後發制於人陛下必知所決擇矣臣聞陛下方  
遣侍從宗臣祇謁宮廟陵寢將親見宮室之禾乘陵寢  
之盜掘此正詩人彷徨不忍去之憂也恐有扶老携幼  
感泣而聽語者少者之哭哭其父與兄也老者之哭哭

其子也陛下追悼其因是誰之過歟還地之恩孰少孰多而河南之民何啻百萬昔日樂生今日效死因民之欲北嚮為百姓請命而以王師甲兵之衆隨之河北之人必有箪食壺漿以迎王師者此臣所以願陛下因而

圖之也

南夫封事當在今年二月士儂張燕行之後今因降旨附見

南夫又為表賀

曰雖虞舜之十二州昔皆吾有然商於之六百里當念爾欺秦檜大惡之 宗正少卿馮檝權尚書禮部侍郎以國信計議之勞也殿中侍御史鄭剛中試宗正少卿

詔故追復宣州觀察使曲端貼還合得恩澤

己丑詔以黃金一千兩附北使張通古進納兩宮時通古與報謝使韓肖胄先行而京東淮東宣撫處置使韓世忠伏兵洪澤鎮詐令為紅巾俟通古過則劫之以壞和議肖胄至揚州世忠將郝抃密以告直秘閣淮東轉運副使胡紡紡白之肖胄故通古自真和由淮西以去世忠怒追抃欲殺之抃棄家依岳飛軍中世忠奏知鄂州范滌縱之滌坐奪官編管汀州仍命鄂州拘滌俟獲

抃訖赴貶所

日歷無此今以紹興十一年五月二十九日世忠乞放范滂狀修入

通古性

聰敏秦檜以胡銓封事示之通古一覽即能誦

庚寅以金人歸河南地命官奏告天地宗廟社稷少

師萬壽觀使榮國公劉光世賜號和衆輔國功臣進封

雍國公 楊武翊運功臣少保京東淮東宣撫處置使

韓世忠遷少師 少保淮西宣撫使張俊賜號安民靜

難功臣遷少傅自劉光世以下其所領三鎮節鉞皆如

舊用講和思也 資政殿學士提舉臨安府洞霄宮汪

伯彥復觀文殿學士 責授左朝奉大夫秘書少監永  
州居住張浚復左宣奉大夫提舉臨安府洞霄宮浚上  
疏言燕雲之舉其鑒不遠敵自宣和以來挾詐反覆傾  
我國家蓋非可結以恩信事以仁義者今日事之虛實  
姑置未論借令敵中有故上下紛雜天屬盡歸河南遂  
復我必德其厚賜謹守信誓數年之後人情益懈士氣  
漸消彼或內變既平指瑕造隙肆無厭之欲發難從之  
請其將何詞以對顧事理可憂又有甚於此者陛下積

意兵政將士漸孚一旦北面事敵聽其號令比肩遣使  
接武求盟大小將帥孰不解體陛下方將經理河南而  
有之臣知其無與赴功而共守者也蓋自堯舜以來人  
主奄有天下非兵無以立國未聞委質外國可以削平  
禍難遠而石晉近而叛豫著人耳目歷歷可想戰國之  
時楚懷王入覲於秦一往不返逮今千載之下為之痛  
心由辯之不早也漢高知項羽之寡思少義其和不可  
恃故雖再敗固陵甘心不悔茲二事者足以為今之戒

矣臣日夜思念此國之大事也陛下宜深慮之熟謀之  
今從約之早肆赦之速用世儒之常說以答敵人之詭  
秘措置失序臣不勝寒心輒不自量為陛下再計嗣今  
以往使之遷延生事姑緩一時謝絕使人可也明告以  
利害詳論以曲直可也萬一有如太公呂后之歸便當  
博詢諸帥獎勵將士以圖恢復之實逼之以大勢使其  
人心終至於乖離示之以威武使其內釁不能以遽息  
國家猶可立也 左中大夫劉大中左通議大夫王庶



並復端明殿學士依舊提舉臨安府洞霄宮 新除左  
通直郎權尚書禮部侍郎兼侍講尹焞為徽猷閣待制  
提舉萬壽觀兼侍講焞以和議不合力辭新命章十上  
乃有是旨焞五辭不拜 太府少卿林待聘守尚書右  
司負外郎 左朝請大夫施垌為太府少卿 靜江軍  
承宣使提舉江州太平觀劉錫知鼎州故事置四川都  
轉運使以掌軍儲而四路漕司各領經費都漕司蓋不  
得與其後起復直秘閣高士瑰為四川轉運判官乃以

糴軍糧為詞請下四路漕司不拘司分名色盡行剗刷  
應副許之至是御史中丞勾龍如淵言如此是於歲約  
軍需之外暗侵諸路漕司歲計勢必及民凋瘵之餘何

以堪此詔制置司措置

成都記土現以二月初三日  
到任此時已畫旨而未行也

士辰太尉武勝定國軍節度使湖北京西宣撫使岳飛  
保平靜難軍節度使川陝宣撫副使吳玠並開府儀同  
三司殿前都虞候保成軍節度主管殿前司公事楊沂  
中為太尉殿前副都指揮使主管都指揮使公事飛以

議和非計累表辭所進官不從 太常少卿張絢直龍

圖閣提點江南東路刑獄公事絢不肯議敵使朝見禮

儀以病告而有是命

此以紹興  
正論修入

秘閣修撰知饒州曾

統守太常少卿 寶文閣待制提舉江州太平觀曾開

知徽州

癸巳詔建皇太后宮室於大內以舊承慶院為之 龍

神衛四廂都指揮使江州觀察使權主管侍衛馬軍司

公事解潛以論事不合求去罷為建寧軍承宣使福建

路馬步軍副都總管

王明清揮塵後錄云紹興壬戌罷  
三帥兵柄韓王世忠為樞密請馬

帥解潛曰雖云講和敵性難測不若姑留大軍之半於  
江之北觀其釁公其為我草奏以陳此事解用其指為  
劄子韓上之已而付出秦會之語韓云何以不素告我  
而遽為是耶韓覺秦詞色有異倉卒皇恐即云世忠不  
識字此乃解潛為之使某上耳秦大怒翌日貶潛單州  
團練副使南安軍安置竟死嶺外張子韶云按潛以此  
年罷馬帥世忠時在淮東十一年四月乃罷三帥兵十  
四年三月潛坐鼎客責嶺外皆與此不合按七年十二  
月檜奏令世忠自楚州移屯鎮江世忠言敵情難測乞  
留此軍遮蔽江淮上從之時趙鼎當國明清誤記也熊  
克小歷載潛罷軍職  
在今年四月亦誤

起居舍人薛徽言卒徽言雅為

趙鼎所知會秦檜於上前論和議事徽言直前引義固

爭反復數刺遂中寒疾而卒上念之賜其家百緡

甲午金人所命知宿州趙榮以城來歸榮不俟割地首先納款由是金人怒之

乙未右迪功郎監明州比較務楊煒獻書於叅知政事李光論和議事大畧以謂屬者敵人求和乃遣招諭使至以無禮臣我舉國諠譁議論不一閣下名來造朝遽復合為一黨寂然無聲有識者謂閣下非不知利害之曉然所以然者賣諂取執政爾自靖康國破主上南狩

無厭之敵既襲廣陵又襲吳中其意固宜重有所在也  
所幸神靈庇護社稷有主比年以來敵人知我不可以  
兵取也又恐我國勢或至於遂強也汲汲然萬里遣使  
見報以太上之喪以探朝廷意謂我若遣使而有請則  
唱為議和空我之國困我之師今復割之中原為一大  
餌以釣江南且向竭中原舉天下實一燕薊猶不三年  
而遂弊況今欲竭江南偏左一方求實中原不知空空  
之地孱老孤寡既不可賦所謂按月所支一切調度何

從出乎東南數十州所有幾何頻年以來換度牒鬻官  
爵出賣戶帖預借和買頭會箕斂衰世培尅之法畧已  
盡行剝膚椎髓無所不至膏血無餘不知何從出乎加  
之供奉禮物動計百萬異時以有限之財充無厭之欲  
是以江海實漏卮爾日者乃始揭榜都城有曰敵人並  
無須求煒所不識也諸公蒙蔽天聽是何異掩耳竊鐘  
也哉倘或梓宮可還真偽未辨如為所欺彼且恃為大  
恩百索累至江南無立錐矣尚何有於中原哉自古連

和結好講鄰國之歡以求偃兵息民者固多有之若乃  
我小而彼大我弱而彼強我衰而彼盛乃欲請和以幸  
旦暮之存擒縱在彼是速滅亡而已我太祖太宗之肇  
造也其割據諸國亦嘗告和於本朝矣未嘗不納之和  
也及其機可乘則命將出師破而滅之如取諸其寄耳  
曾何害於和哉南唐李煜嘗自貶尊稱降損省府取媚  
本朝以乞須臾之命然卒亦無效此蓋強弱盛衰之理  
使然固不可以取媚存也今國家兵籍非不甚衆諸將



非不無人但當謹謀謨於帷幄收敵幣以賞將士期之  
歲月何患中原之不復梓宮之不還太后淵聖之不歸  
乃求臣事於敵人豈不哀哉設若主上睿謀獨斷未悟  
敵機閣下固當身先百辟抗議廷諍雖鼎鑊在前當無  
顧避此誠越國之男子也丞相秦公方且含垢忍耻專  
為誤國之謀傾心敵人猶盧杞以百口保朱泚李林甫  
以盛美稱祿山非煒踈遠之言能入也參政孫公煒之  
男子平生齷齪謹畏天下初不以此責之今日之可任

春秋之責者惟閣下耳願閣下盡發敵人之詐歷告吾君罷絕使命收還金幣正天子之尊號薄敵人之聘禮飭諸將之兵備揚問罪之先聲傳檄中原各保境土人自為戰以待王師一切改轍而圖之如閣下姑欲愛惜名位隨羣而入逐隊而趨亦以謂敵必可信和必可講則請直以此書上之天子寘以典憲煒所不辭書凡數千言其大畧如此煒山陰人也

丙申右承事郎主管台州崇道觀王銍特遷一官銍以

國朝建隆至元符信史屢更書多重複乃以七朝國史  
自帝紀志傳外益以宰執宗室世表公卿百官年表常  
同為中執法言於朝詔銍奉祠中視史官之秩尚方給  
劄奏御至是銍以元祐八年補錄及七朝史上之故有  
是命然銍所修未及半也其後為秦檜所沮不克成

是日金右副元帥潘王宗弼始以割地詔下宿州金主  
亶詔河南吏民畧曰頃立齊豫以守南夏累年於茲天  
其意者不忍遽泯宋氏社稷猶留康邸在江之南以安

吾南北之赤子也倘能偃兵息民我國家豈貪尺寸之地而不為惠安元元之計乎所以去冬特廢劉豫今自河之南復以賜宋氏爾等處爾舊土還爾世主我國家之恩亦已洪矣爾能各安其心無忘吾上國之大惠雖有巨河之隔猶吾民也其官吏等已有誓約不許輒行廢置各守厥官以事爾主無貽悔吝

此書紹興講和錄有之畧載其語以

見金人亦知天意人心之所在也

又命官吏軍民願歸山東河北者聽

行臺尚書省榜會驗近準尚書省降到契丹字詔書今翻寫抄白在前兼會到朝廷已遣人使於江南撫諭去

訖及省會職官百姓軍民事件若是守等江南人使前來交割封界方行曉示實慮至時難以陳告湏合預先開示一應據見在河南諸職官中已據人數外其餘職官百姓使効軍民等至有不同元係河南人如願歸山東河北者並聽仍仰所在官司各具所就事宜先次告陳須至指揮右下宿州可照驗即日詔書內事理宜就便開坐指揮所轄處分明曉諭大小職官軍民僧道耆老別令一一仔細省會各不離本鄉及父母邱墳依舊安業住坐永致義信實為大事不得致違誤錯失付宿州准此天眷二年正月十五日金中雜書云遠蘭元帥同四太子提重兵來廢劉豫未敢明言割地事尚稱欲自有之任張孝純為行臺丞相放赦寬恤以鼓惑聾盲先次計置般運帑藏盡數過河次遣張通古蕭哲來皆是元議定事初約俟蕭張奉使回見得可否方於河南出示割界文字忽於今年正月間陝西帥司申報夏國大軍壓境并密封夏國榜來時四太子方在東京慮腹

皆受敵樂於失措大急先發割界文字前往陝西方解其事此事它書皆無之疑與李世輔相關姑附此俟考

丁酉手詔淵聖皇帝宮殿令臨安府計度修建時胡寅  
丁父喪居衡州以書抵張俊曰聞敵人果欲以河南地  
授我則應接當謹始十餘年間凡有詔令必以恢復中  
原為言所以係百姓心也今乃於臨安增修母后淵聖  
宮殿是不為北遷之計也然則居杭者乃實情而恢復  
者乃空言耳一未是也既下赦令免三年租稅五年徭  
役軍兵依元來營分招收不知何處運物支給及官吏

所請應有從出若取於民則赦令所言是固新附之民也不取於民何以給之二未是也中原之地一是敵人強暴所向憑陵二是世間人不知有三綱動則投拜甚則僭叛號令之初要當申明大義以示勸戒而張楚劉齊並以本非獲已處之自今而後誰不利此三未是也

不知公以為何如

寅此書必在二月己後今因降旨建淵聖宮殿附書之

太常

少卿曾統為殿中侍御史 詔發運經制司去發運二字以戶部長貳一負兼領初叅知政事李光請罷發運

司事下三省

事見去年十一月辛未

至是三省請別置副使或判

官一員不時巡按諸路以檢察內外官司失陷錢物舉

催未到綱運措置糴買及總領常平為職左宣教郎

江南西路提點刑獄公事黃鏗罷鏗范冲所引也御史

中丞勾龍如淵劾諸路監司守貳之不職者九人論鏗

反覆姦佞苛刻擾民故並罷檢校少傅奉國軍節度

使醴泉觀使趙鼎引富弼王安石例再乞納節不許

戊戌端明殿學士同簽書樞密院事王倫為東京留守



兼權開封尹 檢校少傅慶遠軍節度使提舉醴泉觀

郭仲荀為太尉東京副留守兼節制軍馬 召汴京行

臺尚書左丞相張孝純赴行在所孝純自慙乃白右副

元帥潘王宗弼以儀同三司致仕歸徐州滕縣

熊克小歷云孝

純致仕而卒按十一年宗弼所上書云今張既請老而杜亦物故則孝純未死也

尚書戶部

侍郎梁汝嘉兼江湖荆浙閩廣路經制使 司農少卿

霍彛直徽猷閣權發遣經制判官 徽猷閣待制江淮

等路經制發運使程邁知鎮江府 右諫議大夫李誼

言丙戌赦書一切甄叙恐忠邪不分功罪不別臣謂左右賣國虧損名教之人宜不在甄收之列其餘名存白簡重者未及二年輕者未及半年並未許收叙詔令三省銓量取旨

己亥少師護國鎮安保靜軍節度使萬壽觀使雍國公

劉光世為陝西宣撫使

熊克小歷書胡世將除陝西宣撫副使按諸書世將除川陝宣

撫在今年九月六日癸未

保平靜難軍節度使開府儀同三司川陝

宣撫副使吳玠為四川宣撫使內陝西路階成等州聽

玠節制如舊命內侍賫告以賜上因光世除命諭輔臣  
曰河南新復境土所命守臣專在拊循遺民勸課農桑  
各使因其地以食因其人以守不可移東南之財力虛  
內以事外也御史中丞勾龍如淵言丙戌赦書劉大  
中王庶並復職大中之罪在不孝庶之罪在欺君落職  
未及一月例蒙甄叙蓋朝廷不肯任怨耳臣在言責亦  
復避之則凡賞刑失當誰為陛下言哉秦檜進呈二人  
之命遂寢

趙鼎之遺史云秦檜令言者  
論庶大中之罪遂再奪職

東京留守充

交割地界等使王倫副使藍公佐辭行 秘書省正字

汪應辰上疏言和議既諧則因循無備之可畏異議既息則上下相蒙之可畏臣聞前日王倫之行未嘗一詣敵庭此必有深謀至計而畏吾使者之或能覘之也是豈能洞然無疑於我哉臣又聞敵之遷而北也竭取財物盡驅其丁壯而往下至雞豚狗彘靡有遺者豈是能愛於我而不取哉是豈誠有悔過効順之本意哉敵使既去所宜深詔執事交修庶政申戒邊吏以敵人雖

通和疆場之上宜各戒嚴以備他盜今方且肆赦中外  
厚賚士卒褒寵諸帥以為息兵休民自此始矣縱一朝  
遂忘積年之耻獨不思異時意外之患乎此臣所以言  
因循無備之可畏也方朝廷力排羣議時大則竄逐小  
則罷黜雖舉世非之而不顧至有以一言迎合則不次  
擢用今者事既少定陛下必以出於獨斷益輕天下之  
士矣夫事是而臧之猶卻衆謀况其非乎是以小人窺  
見間隙輕躁者阿諛以希寵畏懦者循默以備位淺謀

者遂謂無事而忠臣正士乃無以自立於羣小之間此  
臣所以言上下相蒙之可畏也臣願陛下痛心嘗膽以  
圖中興勿謂和好之可以無虞而思患預防常若敵人  
之至也何至以中國之大而下為讐人役哉

辛丑詔故景福殿使湖州觀察使內侍省副都知藍安  
石已贈保寧軍節度使可特與賜謚於是禮官定謚曰  
良恪渡江後宦者之有謚蓋自此始

癸卯四川宣撫司統制官王俊張從儀田晟以修興元

府洋州堤堰溉田增稅各遷一官仍賜宣撫使吳玠詔  
書獎諭

丙午徽宗皇帝大祥上衰服詣几筵殿易白羅袍行祭  
奠之禮前後不視事十日宰臣率百官進名奉慰 監

察御史江西宣諭李寀言盜賊未息其弊有五一日盜  
賊招安之後不離鄉土良民畏懼未嘗易業二曰賊徒  
受招初無悛改隨復作過比所捕賊徒腰間已有受招  
安公據至五六道者三曰縣官蔽縱不以實聞四曰稅

戶交通苟免禍害五曰公吏受賂多從脫免五弊不去盜賊無時而息乞下帥臣監司守令協心施行從之

庚戌尚書戶部侍郎李彌遜充徽猷閣直學士知漳州彌遜再章求去乃有是命 右諫議大夫李誼言河南

初復江上未可撤屯望密諭三京帥臣凡東南逃歸軍校毋得接納庶幾長江守備不至寡少詔密付諸帥

是月名建康府晉司空卞壺廟曰忠烈 偽熙河經畧使慕容洎叛洎在熙河十餘年驍勇得衆屢為邊患及



金人歸陝西地洧慨然曰吾何面目見朝廷棄熙河去居西夏青唐兩界之間有衆數千洧又寇環州經畧使趙彬追及與戰涇原經畧使張中彥率兵援之洧敗走其衆多降 初偽齊知同州李世輔既奔夏州其家悉為金人所害夏國主乾順偽降制書以李世輔為靜難軍承宣使廊延岐雍等路經畧安撫使時夏國承宣使除書如朝廷之內制而御史中丞知制誥亦皆繫階三省自令僕以下多闕而不除書名者十才一二而已制

今在利州  
大軍庫

建炎以來繫年要錄卷一百二十五

建炎以來繫年要錄卷一百二十五金人地名考證

達賚

原書作撻辣  
誤改見卷一

